

# 1 JON

## Kipihac taxlee wê Jon kivuu ge

### *Kiyang maviha kehe*

<sup>1</sup> Xomxo ti wê kiyang maviha kehe ge, wê dô taxlee di kibun yuu susu viyang viyang ge gên ma ge, xe ob nêl i kitong vô xam, ên xe mamnôn yê i di xe ngô kiyang wê nêl ge, di xe vigêm hôm lec i mi xê. <sup>2</sup> Ên xomxo maviha kehe tige lam le seac vô xe mi xe xê di xovô, om xe nêl kitong vô xam bêga bê maviha luta dôên kehe tige dô hixôn ma Anutu lê, lêc lam le seac mi xe xê. <sup>3</sup> Xe xê di ngô pyap, om xe nêl kitong vô xam êno, ên xe nêb xam vông i vin di lam kituc lec xe, êdêc il vihati le tived hixôn Mag Anutu yuu nu tuc Yesu Kîlisi. <sup>4</sup> Om kiyang ga a kivuu vô xam ên a nêbê il xovô di i vông il nilôd i vô niviha lee.

### *Kiyang wê il ob dô vac xêseac ge*

<sup>5</sup> Kiyang wê xe ngô vô Yesu ge, xe nêl kitong vô xam bêga bê Anutu ge xêseac kehe di mapitoc ti o pitii lec i lêm. <sup>6</sup> Om il obêc nêbê il le kidu tived hixôn Anutu, lêc il obêc tup vô môm mapitoc ge od il nêl kiyang kityooên di il o timu vô kiyang nôn lêm. <sup>7</sup> Lêc il obêc tup vô môm xêseac tîyi xochê Anutu wê dô vac xêseac ge od il hixôn lige vihati, il ob dô hixôn xêdyaa vin lec maên, di Anutu nu tuc Yesu hi ob kitya il nêd nipaên vihati vêl di vông il vô paha lec.

<sup>8</sup> Xame, il obêc nêbê nipaên ti o yêp vac il nilôd lêm ge od il kityoo il di kiyang nôn o yêp vac il nilôd lêm. <sup>9</sup> Lêc il obêc nêl nêd nipaên kitong seac vô Anutu ge od Anutu obêc pwoo i vya vac di sea il lêm, ên i ge nivîha lee kehe, om obêc kitya il nêd nipaên vihati vêl di vông il vô paha lec. <sup>10</sup> Il obêc nêbê il o vông nipaên ti lêm ge, od ge tiyi xochê il nêb Anutu ge xomxo kityooên, mêlêc il kityoo ge di Anutu kiyang ti o yêp vac il nilôd lêm.

## 2

### *Yesu ge il nêd ngidu xônên*

<sup>1</sup> Xam nuge vông vinên, a kivuu kiyang ga vô xam ên a nêbê xam ti vôngên nipaên i ma. Lêc ti obêc vông nipaên ti ge od il nêd ngidu xônên dô wê obêc tu il madnôn di le vô Mag Anutu manôn ên il nêd nipaên ge. Ge xomxo nivîha lee Yesu Kîlisi mê. <sup>2</sup> Ên ici va yib lec il nêd nipaên ên nêb ob kitya il nêd nipaên vêl. Lêc o vông ên icil va lêm. Nge, vông ên il xomxo kibun ga vihati yang.

<sup>3</sup> Il obêc timu vô Anutu kiyang ge od obêc vông xovôên vô il bêga bê il xovô Anutu pyap. <sup>4</sup> Lêc xomxo ti obêc nêbê i xovô Anutu pyap, lêc o vông Anutu kiyang vô nôn lec lêm ge, od ge xomxo kityooên kehe, di Anutu kiyang nôn o yêp vac i nilô lêm. <sup>5-6</sup> Ên xomxo wê timu vô Anutu kiyang ge, ge wê xêyaa vin lec Anutu vixôhilôg. Om xomxo ti obêc nêbê i dô vac Anutu nilô ge od i tup vô môp i tiyi xochê Yesu vông ge lê, ên môp bêge wê obêc vông xovôên vô il ên nêb il dô vac Anutu nilô.

*Xomxo wê xêyaa vin lec lie gee dô vac xêseac*

<sup>7</sup> Xam lige, kiyang wê a kivuu vô xam lec môp xêyaa vin lecên ge, ge o kiyang paha ti lêm. Nge, ge kiyang tikwê wê val vô xam vô buc wê xam ngô Yesu xolac taxlee ge, om xam ngô pyap.

<sup>8</sup> Mêlêc kiyang ga, tiyi xocbê kiyang paha, ên xêseac nôn val dô gwêbaga om ob tii mapitoc la vêl. Mêd kiyang paha tiga, Yesu vông i vô nôn lec di i vô nôn vac xam nilôm gwêbaga hixôn, om il xovô ên il nêbê ge kiyang nôn vixôhilôg.

<sup>9</sup> Xomxo ti obêc nêbê i dô vac xêseac, lêc nilô nipaên yêp vô lie vông vinên, ge od i gên dô vac mapitoc nilô. <sup>10</sup> Di xomxo ngwe wê xêyaa vin lec lie ge, dô vac xêseac nilô, di nipaên ti o le vac i nilô wê ob vông i vô nipaên ge lêm. <sup>11</sup> Lêcom xomxo ngwe wê nilô vô nipaên vô lie ge, dô vac mapitoc nilô di la vac mapitoc di vô lung lungên môp, ên mapitoc vun manôn xôn.

<sup>12</sup> Xam nuge, a kivuu kiyang ga vô xam, ên wê Kîlisi yib om Anutu kitya xam nêm nipaên vêl ge.

<sup>13</sup> Xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihî, a kivuu kiyang ga vô xam ên wê xam pwoo Seten hixôn i nipaên vêl ge.

<sup>14</sup> Xam nuge, a kivuu kiyang ga vô xam ên wê xam xovô Mag Anutu ge. Di xam mage, a kivuu kiyang ga vô xam, ên xam xovô xomxo ti wê dô taxlee ilage di dô gwêbaga hixôn ge. Di xam ngivihî, a kivuu kiyang ga vô xam ên wê xam vô xêkizêc lec di Anutu kiyang yêp vac xam nilôm, om xam pwoo Seten hixôn i nipaên vêl ge.

*Il xêdyaa i o léc vin lec môp yuu susu kibun ga lêm*

<sup>15</sup> Xam xêmyaa i o léc vin lec susu yuu môp nipaên kibun ga lêm. Ên xomxo ti xêyaa obêc vin lec môp kibun ga ge od xêyaa o vin lec Mag Anutu lêm. <sup>16</sup> Ên môp nipaên kibun ga vihati, xocbê nilô ngaên, di môp madoên, di xomxo yong he lec susu kibun ga, môp tigege ti o lam vô Mag Anutu lêm. Nge, ge môp wê xomxo kibun ga xovô ge. <sup>17</sup> Om kibun yuu susu kibun ga wê xomxo doma vô gee vihati xôa obêc ma, léc xomxo wê ngô Anutu xolac mi timu vô ge wê obêc la dô luta léc luta.

*Xomxo wê vông vevac vô Kilisi gee*

<sup>18</sup> Xam nuge, gwêbaga buc myahîpu vô kwabo lec. Ên xam ngô kiyang pyap ilage wê nêb xomxo levac ti obêc val vông vevac vô Kilisi vô buc myahîpu ge, mêd gwêbaga xomxo nipaên tibêgee tibeac divông vevac vô Kilisi ya kiyang kityooên, om il xovô ên il nêbê ga buc myahîpu vô kwabo lec. <sup>19</sup> Xomxo nipaên tigege dô vac il mahîgun lê, léc sea il, ên he o il lige vông vinên lêm. Ên he obêc il lige ge od he obêc dô hixôn il. Léc he sea il, om ge nêl he kitong seac nêbê he o il lige ya lêm.

<sup>20</sup> Léc xam mô, Anutu vông Myakilôhô Ngibua lam dô vac xam vihati nilôm pyap, om xam xovô kiyang nôn pyap. <sup>21</sup> Om ga o tiyi xocbê xam lungên om a kivuu kiyang ga vô xam ge lêm. Nge, a kivuu kiyang ga vô xam ên wê xam xovô kiyang nôn pyap ge, di xam xovô ên xam nêbê kiyang kityooên ti o yêp vac kiyang nôn lêm.

22 Om xam xovô lê. Letya wê kiyang kityooên kehe? Ge xomxo wê nêl ên nêbê Yesu ge o Kîlisi wê Anutu vông i lam ge lêm. Xomxo tibêgee wê vông vevac vô Kîlisi, ên wê he vô nîmî vô Mag Anutu yuu nu tuc Yesu ge. 23 Ên xomxo wê vô nîmî vô Yesu ge, ge tiyi xochê vô nîmî vô ma Anutu êno. Dî xomxo ngwe wê vông i vin Yesu ge, od ge vông i vin ma Anutu êno.

24 Kiyang wê xam ngô ilatikwê taxlee ge, xam hôm pîlihi. Ên xam obêc hôm pîlihi ge od xam obêc le hixôn Mag Anutu yuu nu Kîlisi mî dô. 25 Ên Kîlisi hîlu kiyang vô il pyap ên nêbê il obêc dô madviha luta lêc luta.

26 Kiyang ga, a kivuu vô xam lec xomxo wê nêb ob kityoo xam ya kiyang kityooên ge. 27 Lêc xam ge, Kîlisi vông Myakîlôhô Ngîbua lam dô vac xam nîlôm pyap mî dô gwêbaga. Om xam gên o lungên lêm, om xomxo paha ti o tiyi wê ob val vông xovôên vô xam ge lêm. Ên Myakîlôhô Ngîbua vaci mî vông xovôên vô xam lec kiyang yuu môp vihati, dî xovôên wê vông vô xam ge, o kityooên lêm. Nge, ge kiyang nôn mêge. Om xam hôm Kîlisi kiyang xôn pîlihi mî dô i tiyi xochê Myakîlôhô Ngîbua nêl vô xam ge.

28 Om xam nuge, gwêbaga xam hôm Kîlisi kiyang xôn pîlihi mî dô, êdêc buc wê Kîlisi obêc lop mî lôm le seac ge od il le nidviha vô i manôn dî xonaên yuu nid yocên i ma. 29 Xam xovô pyap ên xam nêbê Anutu ge xomxo nivîha lee, om xam ob xovô bêga bê xomxo wê vông môp nivîha lee ge, ge wê tu Anutu nue.

### 3

#### *Il tu Anutu nue pyap*

<sup>1</sup> Xame, Mag Anutu xêyaa vin lec il luu vêl, om nêl nêbê i nue il, om vixôhilôg il tu i nue nôl. Lêc xomxo nipaên kibun ga lungên il, di kehe bêga bê he lungên Anutu, om lungên Anutu nue il. <sup>2</sup> Xam lige, gwêbaga il tu Anutu nue pyap, di buc timuên, il lungên, il obêc dô bêna? Tige gên o yêp seac vô il lêm, lêcom il xovô pyap bê buc wê Kîlisi obêc lop mi lôm ge od il obêc vyac xê i, di tu xocbê ici va. <sup>3</sup> Om xomxo vîhati wê vông i vin kiyang ga mi dô bin buc wê Kîlisi ob vông i vô nôl lec ge, od he ob viac he nilô i vô nivîha i tiyi xocbê Kîlisi nilô nivîha ge.

<sup>4</sup> Xomxo vîhati wê vông nipaên ge, ge he pwoo Anutu kiyang vac, ên môp nipaên ge wê ob pwoo Anutu kiyang vac ge. <sup>5</sup> Di xam xovô pyap bê Kîlisi lam ên nêb ob lam kitya il nêd nipaên vêl, di Kîlisi ge, nipaên ti o yêp vac i nilô lêm. <sup>6</sup> Om xomxo vîhati wê dô vac Kîlisi nilô ge obêc vông môp nipaên lêm. Di xomxo wê vông nipaên ge, he lungên Kîlisi di o xovô i lêm.

<sup>7</sup> Xam nuge, xam o lêc vông i vin kiyang kityooên wê xomxo ob nêl vô xam ge lêm. Nge, xam xovô bê xomxo wê vông môp nivîha ge, ge xomxo nivîha tiyi xocbê Kîlisi ge. <sup>8</sup> Lêc xomxo wê mi vông môp nipaên ge, he tu Seten xe, ên Seten vaci vông nipaên vô buc taxlee ilage, di i lam tyip gwêbaga hixôn, om Anutu vông nu Yesu lam kibun ên nêbê i lam kitya Seten yuac vêl. <sup>9</sup> Xomxo wê Anutu nue ge obêc vông môp nipaên lêm, ên mavîha wê Anutu vông ge lam

le vac he nilô pyap. Om he tîyiên ma wê he ob vông nîpaên ge, ên he tu Anutu nue pyap. <sup>10</sup> Om môp wê obêc nêl kitong vô il bê Anutu nu nae di Seten nu nae, môp bêga bê xomxo wê o vông môp nivîha lêm, me xomxo wê xêyaa o vin lec lie lêm ge, ge o Anutu nue lêm.

*Môp xêyaa vin lecên lie*

<sup>11</sup> Kiyang wê xam ngô ilatikwê taxlee ge, kiyang bêga bê il xêdyaa i vin lecma, <sup>12</sup> di il o léc tîyi xochê Adam nu tuc Ken ge lêm, ên Ken ge Seten nu om hi li môn yib. Léc

hi i yib lec kehe tina? Kehe bêga bê Ken mi vông môp nîpaên di li môn mi vông môp nivîha. <sup>13</sup> Om xam lige, tîbii nîpaên kibun ga obêc vông vevac vô xam di yê xam nîpaên ge od xam yetacên i léc ma, ên ge o môp paha ti lêm.

<sup>14</sup> Il xêdyaa mi vin lec lige vông vinên, om il xovô pyap ên il nêbê il sea môp mayibên di il dô vac môp maviha. Léc xomxo wê xêyaa o vin lec lie lêm ge, gên dô vac môp mayibên. <sup>15</sup> Ên xomxo wê nilô vô nîpaên vô lie ge tîyi xochê xomxo wê hi xomxo ngwe yib ge. Di xam xovô pyap bê xomxo wê hi xomxo ngwe yib ge, maviha dôên kehe o yêp vac he nilô lêm. <sup>16</sup> Il xovô môp xêyaa vin lec maên pyap lec Kilisi môp wê xêyaa vin lec il om sea maviha wê i vông ge di yib ên nêb ob kisuu il lec ên nîpaên. Mэгem il éno, il xêdyaa i vin lec lige tîyi wê il ob sea maviha wê il vông ge ên i ngîdu he xôn. <sup>17</sup> Om xomxo susu tîbeac ti obêc dô di yê li ngwe wê susu maên ge, léc o xo vigwe pisiv ên i lêm, ge od xêyaa vin lecên wê

Anutu vông ge o yêp vac i nilô lêm. <sup>18</sup> Om xam nuge, il xêdyaa i o lêc vin lec lige ya kiyang yuu myad pileva lêm. Nge, il xêdyaa i vin lec lige nôn di il vông i vô nôn lec.

*Xomxo vông vinên le nivîha vô Anutu manôn*

<sup>19-20</sup> Mêgem il xêdyaa obêc vin lec lige tibêge ge od obêc vông xovôên vô il bê il dô vac kiyang nôn. Om il nilôd obêc so vya vô il lec il nêd nipaên ge od il obêc vông nilôd i vô viyin maên vô Anutu manôn, ên il xovô ên il nêbê Anutu ge levac luu il nilôd wê so vya vô il ge vêl di xovô i la tiyi lec myahîpu. <sup>21</sup> Xam lige, il nilôd obêc so vya vô il lêm ge od il ob le nivîha vô Anutu manôn di xonaên ob ma, <sup>22</sup> di susu vihati wê il ob kitaa vô i ge, od obêc vông vô il, ên wê il tup vô i xolac di vông môm wê i yê manôn nivîha lec ge. <sup>23</sup> Di i xolac bêga ên nêbê il vông i vin nu tuc Yesu Kîlisi lê, di il xêdyaa i vin lecma, i tiyi xocbê xolac nêl vô il ge. <sup>24</sup> Xomxo wê tup vô Anutu xolac ge, ge wê dô vac Anutu nilô di Anutu dô vac he nilô. Di Myakilôhô Ngîbua wê Anutu vông vô il ge vông xovôên vô il ên nêbê Anutu dô vac il nilôd.

## 4

*Kiyang nôn yuu kiyang kityooên*

<sup>1</sup> Xam lige, plopete kityooên tibeac dô vac vîgwe viyang viyang, om le i lêc vông i vin xomxo vihati kiyang wê nêl ên nêbê Myakilôhô Ngîbua dô vac he nilô di vông xovôên vô he ge lêm. Nge, xam yaxên he di xovô bê ge Anutu Myakilôhô Ngîbua nôn, me ge bangwe? <sup>2</sup> Xam

ob xovô Myakilôhô Ngibua wê Anutu vông ge lec môt bêga, xomxo obêc nêl Yesu kitong bê Yesu Kîlisi lam tu xomxo ge, od xam xovô bêga bê xomxo tige, Myakilôhô Ngibua wê Anutu vông ge dô vac he nîlô. <sup>3</sup> Lêc xomxo wê o nêl Yesu kitong bêge lêm ge, od Anutu Myakilôhô Ngibua o dô vac he nîlô lêm. Nge, he kô kiyang vô xomxo kityooên kehe ti wê ob vông vevac vô Kîlisi ge, ên xam ngô pyap bê kiyang kityooên tige obêc val kibun ga, om tyo val dô gwêbaga.

<sup>4</sup> Xam nuge, xam ge Anutu nue, om xam pwoo plopete kityooên pec pyap, ên Myakilôhô Ngibua wê dô vac xam nîlôm ge xêkizêc wê i vông ge luu xêkizêc wê dô vac xomxo kibun ga nîlô ge vêl. <sup>5</sup> Plopete kityooên tige, ge xomxo nipaên kibun ga, om he mi nêl kiyang kibun pileva di xomxo kibun mi vô ninya lehe vô he kiyang. <sup>6</sup> Di il ga, il Anutu nue, om xomxo wê xovô Anutu pyap ge, ge wê ob vô ninya lehe vô il kiyang, di xomxo wê o tu Anutu nue lêm ge, ge wê ob ngô il kiyang lêm. Om môt bêge wê ob vông xovôên vô il bê kiyang lam vô Myakilôhô Ngibua wê kiyang nôn kehe ge, me lam vô kiyang kityooên kehe.

### *Anutu ge xêyaa vin lecên kehe*

<sup>7</sup> Xam lige, il xêdyaa i vin lecma, ên xêyaa vin lecên kehe yêp vô Anutu tîbed, om xomxo wê xêyaa vin lec lie ge, ge wê tu Anutu nue di xovô i nivîha. <sup>8</sup> Di xomxo wê xêyaa o vin lec lie lêm ge, o xovô Anutu lêm, ên Anutu ge xêyaa vin lecên kehe. <sup>9</sup> Anutu nu tuc tîbed, lêc vông i lam kibun ga ên nêb i lam vông il dô madvîha, om môt tige nêl kitong vô il nêbê Anutu xêyaa vin lec il.

<sup>10</sup> Di xêyaa vin lecên kehe, ge o xochê il xêdyaa vin lec Anutu tax lêm. Nge, Anutu vaci xêyaa vin lec il tax om vông nu tuc lam kibun ên nêb i lam kitya il nêd nipaên vêl. <sup>11</sup> Xam lige, Anutu xêyaa vin lec il bêge, mêgem il êno xêdyaa i vin lecma. <sup>12</sup> Xomxo ti manôn o yê Anutu lêm. Lêcom il xêdyaa obêc vin lec lige ge, od ge tiyi xochê Anutu vaci dô vac il nilôd, di xêyaa vin lecên wê Anutu vông ge vô nôn pyap vac il nilôd.

<sup>13</sup> Anutu vông Myakilôhô Ngibua lam dô vac il nilôd, om vông xovôên vô il ên nêbê il dô vac Anutu nilô di Anutu dô vac il nilôd. <sup>14</sup> Xe xê Yesu om xe nêl kitong vô xomxo vihati bêga bê Mag vông nu tuc lam kibun ên nêb i lam vô xomxo kibun ga vêl ên he nêl nipaên. <sup>15</sup> Om xomxo ti obêc nêl Yesu kitong bê Yesu ge Anutu nu ge od Anutu dô vac i nilô di i dô vac Anutu nilô. <sup>16</sup> Mêgem il xovô di il vông i vin bê Anutu xêyaa vin lec il nôn.

Xêyaa vin lecên kehe yêp vô Anutu tived, om xomxo wê dô vac môp xêyaa vin lecên ge, ge wê dô vac Anutu nilô di Anutu dô vac he nilô. <sup>17</sup> Xêyaa vin lecên ob vô nôn nivîha vô il bêga bê buc timuên wê Anutu obêc yaxên xomxo nêl kiyang ge, od il obêc le pîlihi di xonaên obêc ma, ên gwêbaga il dô kibun ga di vông i tiyi Yesu môp wê vông ilage. <sup>18</sup> Môp xêyaa vin lecên ge, xonaên o yêp vac lêm. Ên môp xêyaa vin lecên obêc vô nôn nivîha vac il nilôd ge od obêc tii xonaên vêl, ên xonaên kehe bêga bê xomxo xona ên myaviwen nipaên wê ob kô lec nêl nipaên ge. Om xomxo ti obêc xona ge, od xêyaa vin lecên o vô nôn vac i nilô lêm.

<sup>19</sup> Il xêdyaa vin lec Anutu di vin lec lige, di kehe bêga bê Anutu vaci xêyaa vin lec il tax. <sup>20</sup> Xomxo ti obêc nêbê i xêyaa vin lec Anutu, lêc nilô vô nipaên vô lie ge od kityoo ge. Ên manôn yê lie lê, lêc xêyaa o vin lec lêm, om xêyaa obêc vin lec Anutu wê manôn yêên ma ge bêna? <sup>21</sup> Yesu xolac wê nêl vô il ge, bêga nêbê xomxo ti xêyaa obêc vin lec Anutu ge od xêyaa i vin lec lie êno.

## 5

*Vông vinên nôn obêc pwoo nipaên kibun ga pec*

<sup>1</sup> Xomxo vihati wê vông i vin Yesu ên nêb i Kîlisi wê Anutu vông i lam ge, ge he tu Anutu nue. Di he xêyaa obêc vin lec Mag Anutu ge od he xêyaa obêc vin lec Anutu nue hixôn. <sup>2</sup> Om il xêdyaa obêc vin lec Anutu di il tup vô i xolac ge od il obêc xovô bêga bê il xêdyaa vin lec Anutu nue êno. <sup>3</sup> Il xêdyaa obêc vin lec Anutu ge od il obêc tup vô i xolac. Di i xolac ob vô viyin vô il lêm, <sup>4</sup> ên xomxo vihati wê tu Anutu nue ge, ge wê ob le xêkizêc di pwoo nipaên kibun ga pec. Vông vinên wê il vông ge, ge wê ob pwoo nipaên kibun ga pec. <sup>5</sup> Om letya tiyi wê ob le xêkizêc di pwoo nipaên kibun ga pec ge? Ge xomxo wê vông i vin Yesu nêb i Anutu nu nôn ge wê obêc pwoo i pec.

*Anutu nêl Yesu kitong nêb Yesu ge i nu nôn*

<sup>6</sup> Yesu Kîlisi ge wê lam kibun mêd lam lipac mia di lam kipyax i hi sea di yib. Lêc o lam lipac mia pileva lêm. Nge, lipac mia di kipyax i hi sea hixôn. Mêd Myakilôhô Ngibua ge wê mi nêl Yesu kitong vô il, ên Myakilôhô Ngibua ge kiyang nôn

kehe. <sup>7</sup> Om yon wê nêl Yesu kitong nêbê Yesu ge Anutu nu ge, <sup>8</sup> Myakilôhô Ngibua yuu mia yon hi. Mêd yon ge, yon xôn nêl kiyang tived lec Yesu. <sup>9</sup> Il mi vông i vin kiyang wê xomxo kibun ga nêl nêbê kiyang nôn ge, lêc kiyang wê Anutu nêl ge luu kiyang wê xomxo nêl ge vêl, di kiyang wê Anutu nêl ge, ge nêl nu tuc Yesu kitong vô il. <sup>10</sup> Om xomxo wê vông i vin Anutu nu ge, ge wê hóm Anutu kiyang wê nêl Yesu kitong ge pîlihi vac nilô. Lêc xomxo wê o vông i vin Anutu lêm ge tiyi xocbê nêb Anutu ge kityooên, ên xomxo tige o vông i vin Anutu kiyang wê nêl Yesu kitong ge lêm. <sup>11</sup> Kiyang wê Anutu nêl lec Yesu ge bêga nêbê Anutu ob vông il la dô maviha luta lêc luta, di maviha dôên kehe ge nu tuc Yesu Kîlisi. <sup>12</sup> Om xomxo wê vông i vin Yesu di tu i nue ge, od obêc la dô maviha luta lêc luta, lêc xomxo wê o vông i vin Yesu lêm ge od obêc la dô maviha lêm.

*Il obêc dô maviha luta lêc luta*

<sup>13</sup> Kiyang ga vihati, a kivuu vô xam wê xam vông i vin Anutu nu ge, ên a nêbê xam xovô bê xam kô maviha luta dôên pyap, om xam obêc dô luta lêc luta. <sup>14</sup> Il xovô ên il nêbê il obêc kîtaa susu ti vô Anutu tiyi xovôên wê Anutu vaci vôngo ge od Anutu obêc ngô. Anutu môp bêge, om il o xona ên i lêm. Nge, il ob kîtaa hixôn nilôd nivîha. <sup>15</sup> Ên il xovô ên il nêbê Anutu ob ngô kîtaaên vihati wê il ob kîtaa vô i ge, om il ob xovô hixôn bê susu wê il obêc kîtaa vô i ge od ob vông vô il.

<sup>16</sup> Xomxo ti obêc yê wê li ngwe vông môp nipaên ti, lêc o nipaên levac tiyi wê obêc vông li

tige yib lec ge lêm ge, od xomxo wê yê ge i kitaa vô Anutu bê Anutu i pilepac li tige nê nipaên vêl di i dô maviha. Kiyang ga a nêl lec xomxo wê nê nipaên o levac tiyi wê ob yib lec ge lêm. Vixôhilôg, nipaên dô wê xomxo ob yib lec ge, lêcom a o nêl bê xam kitaa lec nipaên tibêge lêm. <sup>17</sup> Môm soên vihati ge nipaên, lêc nipaên ya ge o tiyi wê ob vông xomxo yib lec ge lêm. Nge, tiyi wê Anutu ob kitya vêl ge.

<sup>18</sup> Il xovô pyap ên il nêbê xomxo wê tu Anutu nue ge ob vông môm nipaên lêm, ên Yesu, Anutu nu, viac he nivîha di kisuu he lec ên nêb Seten i o lêc vông he vô nipaên lêm.

<sup>19</sup> Il xovô pyap ên il nêbê il ga Anutu nue, di xomxo nipaên kibun ga, he vihati dô vac Seten kwa ngibi.

<sup>20</sup> Il xovô ên il nêbê Anutu nu tuc lam vông xovôên vô il ên nêb il xovô Anutu nô n. Mêd gwêbaga il dô vac Anutu yuu nu tuc Yesu Kîlisi nilô. Di Anutu ge, Anutu nô n vixôhilôg di maviha kehe wê il ob dô madviha luta lêc luta ge.

<sup>21</sup> Om xam nuge, xam viac xam di vô nimim vô anutu kityoên.

**Yesu Xolac**  
**The New Testament in the Patep Language of Papua**  
**New Guinea**  
**Nupela Testamen long tokples Patep long Niugini**  
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

---

PDF generated using Haiola and XeLaTeX on 22 Feb 2024 from source files dated 31 Aug 2023

3d2c844d-4bc8-590b-bbf2-3a5fcd1f7ad8